

Selasa, 20 Ogos 2019

PTPTN keluar waran wang pendahuluan pembiayaan RM31 juta



KANGAR: Perbadanan Tabung Pendidikan Tinggi Nasional (PTPTN) mengeluarkan waran Wang Pendahuluan Pembiayaan (WPP) sebanyak RM31 juta kepada 20,716 pelajar bagi kemasukan pengajian peringkat ijazah ke universiti awam sesi September ini.

Pengerusinya, Wan Saiful Wan Jan, berkata pemberian WPP ini permulaan kepada usaha PTPTN untuk memastikan tiada pelajar yang tidak dapat melanjutkan pelajaran ke institusi pengajian tinggi (IPT) disebabkan masalah kewangan.

“WPP sebanyak RM1,500 diberikan bagi setiap seorang pelajar warganegara Malaysia yang telah membuat persetujuan menerima WPP

melalui saluran yang ditetapkan oleh PTPTN semasa memohon UPU Online ataupun melalui portal kemasukan IPT.

“Ibu bapa pelajar mestilah penerima Bantuan Sara Hidup Rakyat (BSH) serta memenuhi kriteria yang ditetapkan oleh PTPTN,” katanya kepada pemberita selepas majlis penyerahan WPP di sini.

Bagi negeri Perlis, seramai 231 pelajar akan ditawarkan WPP bagi sesi ini dengan peruntukan sebanyak RM346,500.

Wan Saiful berkata, surat tawaran WPP yang diberikan mempunyai tempoh sah laku selama dua bulan dan tempoh sah laku tawaran WPP pada kali ini adalah pada 27 Ogos hingga 27 Oktober tahun ini.

Katanya, pelajar boleh menunaikan WPP berkenaan di mana-mana kaunter Bank Islam mulai 27 Ogos ini dengan membawa surat tawaran dan MyKad pelajar itu sendiri, namun wakil tidak dibenarkan.

Beliau turut mengingatkan pelajar berkenaan untuk membuat permohonan pinjaman PTPTN secara online melalui Portal PTPTN yang bermula 1 Ogos lalu hingga 31 Ogos ini bagi memastikan pinjaman dapat diproses dan diluluskan sebagaimana sepatutnya.

“Pelajar hendaklah merujuk kepada Bahagian Hal Ehwal Pelajar IPT masing-masing atau terus kepada PTPTN sekiranya terdapat sebarang keraguan atau kekeliruan,” katanya.

Pada majlis itu juga, beliau turut menyampaikan zakat PTPTN bernilai RM5,000 kepada seorang pelajar asnaf Perlis, Nurul Ain Mohamad Firdaus, 18.

Beliau berkata zakat PTPTN mula ditubuhkan pada 2016 untuk memastikan PTPTN patuh syariah. - BERNAMA